



Regulativ d'indemnisaziun

M E S S A D I

dalla suprastanza communal a al cussegl da vischnaunca

Preziada signura presidenta
Preziadas signuras cusseglieras
Preziai signurs cussegliers

El program d'activitad 2009 – 2012 ei la revisiun dil regulativ da salarisaziun taxada sco ina fatschenta d'emprema prioritad. Ella ei necessaria per s'adattar allas refuormas succedidas entras la revisiun totala dalla constituziun communal. Ina adattaziun ei era indicada muort las relaziuns semidadas. Specialmein setracta ei da risguardar la carischia occurrada dapi la davosa revisiun digl onn 1999, respectivamein digl onn 2005.

Ils 19 da settember 2011 ha la sumprastanza communal incaricau ina grappa da lavur d'elaborar ina proposta per ina revisiun dil regulativ da salarisaziun. A quella han fatg part: Francestg Cajacob (ch'enconuscha las relaziuns en autras vischnauncas), Alfons Quinter (sco representant dall'economia privata), il president communal (sco cau dallas finanzas) ed il canzlist communal (sco cau dil persunal, cun vusch consultativa).

Suenter ina emprema examinaziun ein ins vegnius alla conclusiun ch'ei seigi necessari da sparter igl actual regulativ da salarisaziun en in regulativ d'indemnisaziun ed in regulativ per il persunal communal. Sco model ei vegniu sebasau specialmein sil sboz cantunal sco era sin las reglamentaziuns dallas vischnauncas da Domat/Ems e Claustra (cun in parlament communal, semeglionts a quel dalla vischnaunca da Mustér).

Tenor quei niev concept cumpeglia il regulativ d'indmenisaziun sulettamein l'indemnisaziun per ils commembers dad autoritads e cumissiuns sco era da funcziunaris. La reglamentaziun dalla salarisaziun dil persunal succeda en in regulativ separau.

Il sboz per il niev regulativ cuntegn tier mintga artechel in commentari, aschia ch'il messadi sa serestrescher sin entginas constataziuns generalas.

La lavur prestada per la vischnaunca duei en principi vegnir remunerada, quei tenor la pratica secumprovada. Ei setracta da mudestas indemnizaziuns, quei considerond la situaziun finanziaria dalla vischnaunca e risguardond il principi dalla lavur cumina.

L'indemnizaziun succeda en fuorma d'ina indemnizaziun per seduta, per ura ni cun schurnadas d'ina vart e da pauschalas (fixums) da l'otra vart. La directiva per las adattaziuns proponidas ei la carischia occurrada dapi la davosa revsiun ed ina mudesta correctura.

El futur duei era il cussegl da vischnaunca vegnir indemnisaus sco las outras cumissiuns. Per in presidi d'ina cumissiun (nua ch'il president obtegn negin fixum) duei vegnir pagau in mudest supplement, quei per cumpensaziun dalla lavur preparativa.

Ina tematica speciala ei l'indemnizaziun dalla suprastanza communal. Quella sto star en relaziun cun il temps impundiu e cun la responsablada surprida. En principi ei il sistem actual secumprovaus. Ei dat denton plirs models per l'organisaziun dalla lavur executiva. La finfinala setracta ei d'ina damonda politica e perquei ha la gruppa preparativa suttamess sulettamein la proposta da limitar igl engaschament dil president communal a max. 80% d'ina plazza cumpleina.

Era la suprastanza communal indichescha mo la basa per la fixaziun dall'indemnizaziun dil president communal, senza fixar definitivamein il volumen da siu engaschament. Quella damonda vegn dilucidada ella cumissiun parlamentara predeliberonta, ch'il cussegl da vischnaunca ha nominau per la preparaziun da quella fatschenta.

Las consequenzas financialas dallas midadas proponidas ein mudetas e vegnan a semover entuorn frs. 10'000.-- (senza ils fixums dalla suprastanza communal).

Proposta

Considerond la motivaziun suramenziunada

propona

la suprastanza communal al cussegl da vischnaunca d'approbar il regulativ d'indemnizaziun.

Suprastanza communal Disentis/Mustér
Il president: Il canzlist:


Dr. Dumeni Columberg


Andri Hendry

Disentis/Mustér, ils 23 da fevrer 2012

- Regulativ d'indemnizaziun